



Republika e Kosovës
Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

Datë: 08.05.2025
Numër Protokoll: 3226/2025

A.nr.228/2025

Këshilli i Pavarur Mbikëqyrës për Shërbimin Civil të Kosovës - Kolegji për Shqyrtimin dhe Vendosjen e Ankesave, në përbërje nga: Malsore Gashi-Bajraktari, kryetare, Eshref Shabani dhe Ardita Haxhnikaj-Demi, anëtarë, me Ylber Fetahaj, në cilësinë e procesmbajtësit, në procedurë sipas ankesës me numër A.nr.228/2025, të datës 28.01.2025, të parashtruar nga ankuesja F.H., kundër Komunës së Prishtinës, në çështjen juridike “*Kërkese nga marrëdhënia e punës*” duke vepruar në pajtim me nenin 6 paragrafin 1 nën paragrafin 1.1, nenin 16 paragrafi 3 dhe nenin 18 paragrafin 1 nën paragrafin 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, dhe Rregulloren Nr.02/2018 për Procedurën e Shqyrtimit dhe Vendosijes së Ankesave në Këshillin e Pavarur Mbikëqyrës për Shërbimin Civil të Kosovës, me datë 08.05.2025, mori këtë:

V E N D I M

I. Aprovohet si e bazuar ankesa A.nr.228/2025, e datës 28.01.2025, ashtu që **detyrohet** Udhëheqësi i Njësisë së Burimeve Njerëzore në Komunën e Prishtinës, që brenda afatit prej 15 ditësh nga dita e pranimit të këtij vendimi të shqyrtoj Kërkesën e datës 24.12.2024 të parashtruar nga ankuesja F.H. dhe të nxjerr akt administrativ në pajtueshmëri me dispozitat ligjore në fuqi.

II. Këshilli i Pavarur Mbikëqyrës për Shërbimin Civil të Kosovës, duhet të njoftohet me shkrim pas ndërmarrjes së veprimeve në pajtim me këtë vendim.

A r s y e t i m

Nëpunësja civil, F.H. (në tekstin e mëtejme referuar: Ankuesja) e punësuar në Komunën e Prishtinës, me datë 28.01.2025, ka parashtruar ankesë me numër protokoll 593/2025 të regjistruar nën shenjen Anr.228/2025 në Këshillin e Pavarur Mbikëqyrës për Shërbimin Civil të Kosovës, kundër mos kthimit të përgjigjes në lidhje me kërkesën e datës 24.12.2024 të parashtruar në Burimet Njerëzore të Komunës së Prishtinës në raport me kërkesën e saj lidhur me klasifikimin e pozitës së punës.

Këshilli i Pavarur Mbikëqyrës për Shërbimin Civil të Kosovës (në tekstin e mëtejme referuar: Kolegji i Këshillit) Nga administrimi i shkresave të lëndës rezulton se ankuesja është e punësuar në Komunën e Prishtinës, konkretisht sipas Akt emërimit të fundit me Referencë: 01-112-1161 të datës 16.11.2024, e njëjta ushtron pozitën e punës të *Zyrtare e Lartë për Shëndetësi*, në Komunën e Prishtinës, me koeficient të përcaktuar të pagës 5.7. Si rrjedhojë, e njëjta më datë 24.12.2024, ka parashtruar kërkesë tek organi përkatës i punësimit, me pretendimin ankimor për harmonizimin dhe ndryshimin e kategorisë dhe koeficientit të pagës nga ai aktual në kategorinë specialistë me koeficientin e pagës 6.6.

Ndërsa ankuesja, me datë 28.01.2025 ka parashtruar ankesë në Këshillin e Pavarur Mbikëqyrës për Shërbimin Civil të Kosovës, kundër heshtjes administrative në raport me kërkesën e saj, mbi pretendimet për trajtim të diskriminues dhe të pabarabartë në vendin e punës, rrjedhimisht i propozon Këshillit që koeficienti dhe pozita e saj të harmonizohet nga kategoria profesionale me koeficientin 5.7 në kategorinë specialist më koeficientin 6.6 dhe të kompensohet diferenca e pagës.

Kolegji i Këshillit, ndërlidhur me rregullat e veprimeve procedurale të një organi publik, ju referua dispozitave të Ligjit Nr.05/L-031 për Procedurën e Përgjithshme Administrative (*tutje referuar: LPPA*), përkatësisht nenit 10 paragrafi 2 ku përcaktohet se: *2. Organi publik zhvillon procedurën administrative sa me të shpejtë dhe me sa më pak shpenzime, për të dhe për palën, duke mos cenuar çfarë është e nevojshme për një rezultat të ligjshëm e të përshtatshëm të procedurës administrative, si dhe nenit 97 paragrafi 1 të këtij ligji, ku përcaktohet se: 1. Një procedurë administrative e nisur sipas kërkesës, përfundon me njoftimin e një akti administrativ apo lidhjen e një kontrate administrative, dhe si rrjedhojë në kuptim të këtyre dispozitave ligjore si dhe bazuar në shqyrtimin e provave materiale të çështjes, Kolegji i Këshillit konstatoi se organi përkatës i punësimit, në rrethanat e rastit konkret, nuk ka vepruar në pajtueshmëri me dispozitat përkatëse ligjore, në raport me Kërkesën e datës 24.12.2024, të parashtruar nga ankuesja, ngase sipas bazës ligjore si me sipër, vullneti i organit publik në realizimin e autoritetit publik formësohet në procedurë administrative dhe manifestohet në formën e njërit prej veprimeve administrative, siç janë: akti administrativ; kontrata administrative apo akti real, dhe se në vlerësimin e Kolegjit, organi përkatës i punësimit, në kuadër të autorizimeve të përcaktuara me legjislacionin në fuqi, është dashur që të nxjerr akt administrativ në kuptim të vendosjes dhe të njoftoj palën për aktin e tillë, brenda një afati prej 45 ditësh sikurse përcaktohet me nenin 98 paragrafi 2 apo afatit të vazhduar sipas nenit 99 paragrafi 1 të LPPA-së.*

Kështu që thënë si me sipër e duke u bazuar në nenin 18 paragrafin 1 nën paragrafin 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji i Këshillit vendosi të aprovoj si të bazuar ankesën e datës 28.01.2025, në kuptim të shkeljeve procedurale, dhe si rrjedhojë detyroj zyrtarin përgjegjës të burimeve njerëzore, gjegjësisht Udhëheqësin e Njesisë së Burimeve Njerëzore të Komunës së Prishtinës që në respektim të dispozitave procedurale të shqyrtoj Kërkesën e datës 24.12.2024, dhe të nxjerr akt administrativ në përputhshmëri me dispozitat ligjore në fuqi.

Këshillë Juridike: Vendimi hyn në fuqi në ditën e nënshkrimit nga Kryetari i Kolegjit. Pala e pakënaqur, e cila pretendon se vendimi i Këshillit nuk është i ligjshëm, mund të iniciojë konflikt administrativ në Gjykatën Themelore në Prishtinë/Departamenti për Çështje Administrative, brenda afatit prej tridhjetë (30) ditësh, nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda A.nr.228/2025

Ylber Fetahaj

Procesmbajtës

Malsore Gashi Bajraktari

Kryetare e Kolegjit

Vendimi i dërgohet

- Ankueses; F.H.;
- Udhëheqësit të Burimeve Njerëzore të Komunës së Prishtinës; dhe
- Arkivit të KPMSHCK-së.